

## ■ DA CUMINONZA A RUSCHEIN

# Noss'aua da mintgagi

**La davos'occurrènz «da cuminonza a Ruschein – la sera dils treis» dad uonn ei dedicada all'aua. Buc a quella che croda giu da tschiel ni che va dil Rein giu, mobein a quell'aua che cuora sco sch'ei secapess da sesez cura che nus arvin las spinas dad aua en casa.** Hosp ei **Toni Cadalbert**, caufontauna dalla vischnaunca dad Ilanz/Glion. El ei il responsabel per il provediment d'aua. Tenor la cronica dil vitg ha Ruschein survegniu igl onn 1910 siu emprem provediment d'aua cun reservuar, hidrants e fontaunas. Quei vul denton buca dir che tuts vevan da gliez temps era gia automaticamein aua en casa. Ils biars vevan dad ir vinavon per aua alla fontauna. Oz enconusch'ins quei ir per aua vi tier la fontauna silpli aunc sch'ins ei si en las tegias da cuolm. Ei dat da quels e da quellas che gaudan quella romantica da cuolm senza aua currenta – silmeins per zacons gis. E daventan lu cunscients puspei inaga tgei regal che quei ei atgnamein dad haver aua en abundonza e da tut temps en casa. Sco quei che nies paun da mintgagi ei buca gratuits ha naturalmein era noss'aua da mintgagi siu prezi.

La vischnaunca fusiunada dad Ilanz/Glion ha actualmein 4946 habitonts en sias sis fracziuns dalla vart dretga dil Rein, en sias sis fracziuns dalla vart seniastra dil Rein ed el marcau da Glion sez. Las differentas installaziuns dil provediment d'aua ein vastas: 20 reservuars, 138 tschaffadas da fontaunas, 400 hidrants e 198 km lingias dad aua ordeifer las casas. Cadalbert vegn a concretisar empau quellas cefras. El vegn ad informar nua che noss'aua vegn insumma



**Toni Cadalbert, caufontauna dad Ilanz/Glion.**

MAD

tschaffada e co la qualidad dall'aua vegn controllada regularmein. Ed el vegn era a raquintar co in provediment dad aua modern funcziuna ozilgi – per che tuts hagien aua da beiber schubra, aua per il diever quotidian ed aua avunda per la cuminonza en situaziuns d'urgenza. La sera sur dall'aua da mintgagi ei dil reminent la 25avla sera «da cuminonza a Ruschein – la sera dils treis». Entschiet cun quellas seras ha ina gruppa d'interess igl onn 2016. E per ils 3 da mars 2020 ei gia la proxima sera planisada.

**«Noss'aua da mintgagi» dumengia, ils 3 da november 2019 allas 20.15 en casa da scola Crestas a Ruschein. Entrada gratuita. Beinvegnidas ein sco adina era personas d'ordeifer. Suenter l'occurrènz vegn purschiu in aperitiv. Dapli sin [www.dacuminonza.ch](http://www.dacuminonza.ch)**

*Per la gruppa d'interess «da cuminonza a Ruschein – la sera dils treis»:  
Maria Cadruvi*